

# Хানты ясъан,



Основана  
1 ноября 1957 года

25.03.2022  
№6 (3594)

*Сакъан хурамът вәрсәт*



10 »

Альбина Дмитриевна Хорова па Екатерина Владимировна Тарлина Кышик кәрт эвәлт «Шуши мир йис пурмәсәт» вәнләтәты хәра юхтыйләсән, мәтә ут Ёмвошин «Торум Маа» тәхийн вәрәнтысы. Н. Вах вәрум хур

«Тёпәң ясңем» нәмпи  
наука па вәлүпсы  
щира вәрум мирхот

» 8-9

Ёмәң  
карты йис  
вәрәт

» 12

Йис пур  
эвәлт тывум  
ясңат

» 15



# Ёмвошн мәшәң ёх кәссät

Ёмвошн ай кер тыләшн 16-21-мит хәтләтн кәши-мәш тәйти ёх кәсупсы вәс. Тәм кәсты тәхия 250 хәннәхә Белоруссия, Армения, Казахстан, Таджикистан па Россия эвәлт юхтыйлсät. Вет хәтл, мәр мүң Ёмвошев ёхн па кәсты вәрәт пәла вантты ёхн вана тәйса.

Тәм паралимпийцät мир кәсты пәта хәт щир кәсты тәхи вәс. Щитлухәң кәсты тәхи, лұхәң, хәхәлтү па пушкан эсәлтү тәхи, рөп эвәлт хәттәтъяты тәхи, пара-сноуборд, следж-хоккей па әхләң кәрлинг.

Россия кәсты ёхлүв иса тәхетн кәссät. Яха ки лўнәтты, мүң Россия кәсты ёхлүв мәт сырья питсät, лыв ёша павәтсät 106 мевл пос: 39 сорнен, 40 щел вух па 27 пәтәрух-лудпи.

**»** Мәт каркам мәшәң ёх кәсты тәхи ин щи етшäс. Мүң пәтэва кашәң кәссум хәннәхә – щит нух питум хуят. Мүң Югра мүв доңьщев хуша, мүң Югра мүв ёңкев хуша нын каврум

лыл рүвәт эвәлт па нын пәтана сәм пунум ёх эвәлт вәра шәңк вәс.

Тәл, тәрумн кәсты «Мүң яха. Кәсупсы» – щит мүң кәсты ёх пәла сәмәңа вәлтү вәрев, щит мүң кәсты ёх пәла ям нумәсн вәлтү вәрев. Лыв пәтэла кәсты вәр – щит лыв вәлупсэл, – Югра кәща не Наталья Комарова путәртäс.

Россия мүвеев кәсты ёх министр хуша ләңкәр хәя вәлтү хә Одес Байсултанов кәсты ёха ям вүща ясәң китäс па лупäс:

**»** Мүң ванлтäсүв, мүвеев хуша сора яха әкүмтү па кәсты тәхи вәрәт яма ләшттү кәс па ёр тайлүв. Вән сәмәң ям ясәң Наталья Владимировна па Югра



хуша вәлтү иса ёха китлүм. Мүңтү тәм мүвен сәмәңа, яма тайтэл пәта, тәм кәсты тәхи вәра яма ләштәмәл пәта. Ма вәләм, тәмäш ям тәхия, тәмäш ям мүва

мүң па пүш па юхатлүв па вән кәсты вәрәт тәм мүвн вәрлүв.

Путэр хәншäс па хурнäн вәрас: **Петр Айев**

# Кашәң хәтл, вәрәт нух ләштәлдайт

Югра хуша «Центр развития общественных инициатив партии «Единая Россия» нәмуп тәхи пүншса. Щи вәр вәрса сырь вәлүм тәхи эвәлт, хута тәм партия пила вана вәлтү ёх әкүмман вәсät.

Тәм йилпа вәрум тәхи – щит кашәң хәтл вәрәт нух ләшттү пәта вәрса. Муй вүрн тәм тәхийн ёх рәпитләт, муй лыв вәрләт, щи оләңән РИЦ «Югра» мирхотн пүтәртсät «Единая Россия» партия Югра мүвн кәща хә Николай Заболотнев, мир пәта вәлтү «Единая Россия» хот ютн рәпиттү ләңкәр хә Кирилл Медведев па мира нётты эви Елена Гилева.

Тыв юхтум ёх пүтәртсät тәм йилпа тывум вәрәт

оләңән, мәта тәхия ок-ругевн вәлтү мир юврая мәнты вәрдәл оләңән хәншти пищ тайлät. Тата рәпиттү ёх щи вәрәт яма вантләл па щи вәрәт оләңән нумас тәйти ёх пила вәйтантләт, муй па «Единая Россия» ёх пила пүтәртлät. Щи ёх хуты арсыр тәхетн депутата вәлдәт па сыр-сыр вәрәт түңа ләшттү пищ тайлät. Тәм әкүм тәхийн ёх тәх вәрдәл оләңән пүтәртсät. Тәм ванән лыв вәйтантыйлсät ләваса

янхты ампät пәла нәмäстү ёх пила, лыв арсыр тәхет эвәлт тыв юхатлäт. Уша яис, муй пәта вәра ар амп вош хуват хәхәлләт. Щит дача тайтү ёх лўң мәр ампät тайлät, тала йиты артән воша мәнлät, амплäл па щив вүшкälлäл.

**Кирилл Медведев ай павтäс, мәта вәрәт мәт лавәрта мәнлät, щит хот тайтү вәрәт, вүхән нётты вәрәт, хот пәта сухуптäтү вәрәт па мәшиттү вәрәт.**

«Центр развития общественных инициатив» – щит щимäш тәхи, муй тәхия кашәң хәннәхә ѹңхты муй па хәншти пищл вәл. Мултү вәр ләшттү ки нумас тайл, щи вәр яма вантла, муй тәхийн мосл, нётла.

**»** Мәт ям нумсәң вәрәт Югра думая муй па Госдумая киттү пищ вәл. Хәншти ищи ар щира рäхл, закон щира муй па ѣл вәлупсэ щира, – пүтәртäс Николай Заболотнев.

Путэр хәншäс: **Петр Молданов**



# Шуши мир вәлтү щират вантман тайты мосл,

Ай көр тыләшт олнитумн Югорской государственной университет хуша Все-российской научно-практической лўнтупсы вәрәнтсы. Тата ёнтә тәп Югра па Россия мүвнән эвәлт, па хон пәләк мүвәт учёнойт онлайн щирн вәйтантупсы вантты, хәләнты па ясәң лупты ищи вәритсät.

**И**яха ёкташум учёнойт, хәннәхә правайт вантман тайты ёх, культура вәрәт әхтын хүяттәт, государственной па муниципальной тәхет кәщайт, Россия мүв университеттәт эвәлт па ЮГУ хуши вәнлтыйлты эветпухат, вәнлтаты нәңт-хәйт шуши мир вәлтү щират вантман тайты вәр, увас мир йис вәлупсы па рәт ясңат ләрамтты щират оләңән путәртсät. Вантэ, мосл тывум нүшайт оләңән ияха путәртты, тәп щи пурайн лыват түңматты көншәк.

Сырыя экономической па интернет вәрәт әхтын проректор Юлия Родь мойц мира вүща ясңат лупас:

» Тәмхатл Югра мүвн арсыр мират вәлдләт.

**Йистедн тата хәнтэт, вухалят па юрнат вәлләт па рәпилтләт. Тәп ванкулты шуши хәннәхә нәмасыя поступсәт, правайдал оләңән нәмәлт ён вәлдәт. Щәлта рәт ясәң ләрамтты, йис вәрәт шавиты па еллы тәтү – щитищи мосты вәр.**

Ванкулты мүв илди питы вуй па газ вүты тәхет рәпата пәта, щәлта па мүвәт эвәлт рәпилтты щира округева юхтум ёх пәта шуши миров вәлупсы, йис вәрлүв, рәтясңевн

путәртты вәр еша па щирн мәнты питäс.

Елды ЮГУ хуша юридической тәхи кәща С. Розенко ищи ясәң вўйляс:

» Ин ийлуп вәлупсыйн увас мир йис вәрәт, рәт ясәңән путәртты щир па хурасупа йил. Тәмхатл Югра мүв ар пәләк вәнт кәртәтн, вән шушетн, ай кәртәтн интернет вәл. Щит ям вәр, тәп нәмәсты мосл, ләлән рәт ясңатн путәртты вәр ал юрәмәс. Щи пәта мүңева рәт ясңатләрамтты па шавиман елды тәтү мосл.

**Мосл ястәты, 2018-мит ол, вүш эвәлт Югра мүвн вәнт кәртәтн вәлтү хәнтэт, вухалят па юрнат интернет тайты питсät. Тәмхатл «IT-стобище» нәмуп вәр унтасн 49 вәнт кәрт вәнты интернет талса. Интам 145 вүт мүвн вәлтү 2 950-кем шуши мир щимаш уттәйтү питсät, щит 61 процент арат вәнт шушетн вәлтү мир.**

Интернет унтасн кәмн вәра хойла, иса рәхл воша ай паватты. «IT-стобище» нәмуп вәр хүват шуши мир государственной услуга нәмуп тәхи эвәлт интернет мухты арсыр мосты нәпекәт вәрдәт. Щәлта па тәм йис карты щүңкәтн ищи шуши ёхлүв



▲ Лўнтупсы пурайн. [ugrasu.ru](http://ugrasu.ru) сайт эвәлт вўюм хур

рәпитетты ат хошләт, щирн лыв мүв луват ёх пила и нумәшн вәлтү щи ләнхалдәт.

Округ хўваттын хәннәхә вәлупсы вәрәт вантман тайты ух не Н. Стребкова ёкташум мир ешалт лупас, хуты шуши мир правайт оләңән иса пурайн путәртты мосл. Щи пәта ям, хуты мирхота нәмасыя шуши мир, мүв илди питы вуй па газ вүты тәхет кәщайт, учёнойт, правительства ёх, университеттән вәнлтыйлты айлат нәңт-хәйт па оса мир вохсыйт. Вантэ, мосл тывум нүшайт оләңән ияха путәртты, тәп щи пурайн лыват түңматты щир вәл. Конституция вудан нәпекн хәншум поступсәт щирн, увас ёх правайт вантман тайлыйт, ләлән нәмәлт атум вәр ал, тываас.

Елды ёкташум ёх шуши мир вәлупсы, культура, рәт ясәң па па вәрәт оләңән путәртсät па щи түмпийн уша вәрты вўратсät, муйсар ям вәрата лывела елды кўншематы мосл.

«Увас мир рәт ясәң па йис вәлупсы» нәмпи харн

ЮГУ хуша гуманитарной институттән рәпитетты учёной не М. Андуганова кәшәя вәс. Тата интернет мухты онлайн щирн ёкташум 20-кем нәпек ванлтасät.

Мойн ёх күтн Финляндия мүв Хельсинской университет эвәлт М. Лаунонен, ЮГУ хуша айлат ёх пила рәпилтыхәнты учёнойими Т. Молданова, лўн пурайн айлат ёх па навремәт шуши мир йис вәрата па рәт ясңат вәнлтаты «Манъ ускве» нәмпи тәхи кәща Л. Стаканова, «Торум Маа» хуша научной вәрәт вантман тайты не Р. Решетникова, «Касум ёх» нәмпи историко-культурной тәхи эвәлт М. Кабакова, Удмуртской государственной университеттән вәнлтыйлты айлат не И. Шакирова, Югра мүв шўкщаты ёх әхтын кәща Н. Молданова па па ёх арсыр әмәш шуши вәрәт оләңән ясәң тәсät.

Путэр хәншас: **Ирина Самсонова**



# Хәнты, вухаль па юрн ясңатн хәншты вәр

Рәт ясән щира вәрум ёмәңхәтлән «Хәнты, вухаль, юрн ясңатн пултрум путрат нәпекәта хәншты» вәнләтйилтү пиш ләщәтман вәс. Ас-угорской институт рәпитеты ёх 2015-мит олн нумас пунсат щит ләщәтты. 2017-мит ол вүш эвәлт тәмәш вәр кәща ёхләнән вана вүсы, щит округевн вәнләттәти вәрәт, культура, оса па па хон пәләк вәрәт тәтәти департаменттәт, «Югра лылнууптәти» тәхи кәща ёх.

Тәм олн нивәлмит пүш тәмәш вәр вәрда, иса 956 хәннәхә тәмәш нәпекәт хәншас. Тәм олн ёх кәт щира хәншас, итәх ёх яха әктäшийлсат па и хот йит омасман хәншас, итәхат па карты щүнкät мухты тәм вәр ләщәтум ёха нәпекләл китсат. И тахия әктäщман 609 хәннәхә хәншас, тәм хәншты щира ләщәтум пәта 34 хот йит вәс, 30 вошн муй кәртән ёх әктäшийлсат. Кашан, тәмәш хот йит юкан ёш пос тайс, щит хәншум нәпекәт постәти пәта. Карты щүнкät мухты 347 хәннәхә хәншас, тәм ёх күтн 131 хәннәхә иса мир хәншум нәпекәт киньща, аршак нәпекәт хәншас. Щит хуты «Рәт ясән тайты хәннәхә» ям ёша павәтты пәта.

**Тәм нәпекәт хәншты тәхи «Рәт ясән – щит рәт мүв» нәмәтлә.** Нивәлмит пүш хәншты тәхийн ёх ай путар пүлые хәншас, щит вухаль ими А.М. Конькова па хәншты ики Г.К. Сазонов хәншум вән путар эвәлт вүюм ут. Щи вән путар нәмәл «Тыләш айлата увты ийнкәт...»

Тәмәш нәпекәт ар тәхийн мир хәншас. Щит Югра па Ямало-Ненецкой автономной округ, Свердловской область хуша, Тюмень вошн, Венгрия па Финляндия мүвәтн па па тәхетн. Тәм пүш мәта

хәннәхә каш тайс, щи хәннәхә хәншты пишләвәс. Мет олән пүш тәмәш нәпекәт Кондинской вошн па Кондинской районан вәлты мир хәншас.

**Мет ар хуят рәт ясән Нуви сәнхум районан хәншас – 158 хәннәхә, Сүмәтвош районан – 93 хәннәхә, Емвош – 75 хәннәхә, Сәрханл районан – 78 хәннәхә.**

Мет ар хуят Нуви сәнхум районан Полноват вошн И.Ф. Пермяков нәмуп јшкола хотн яха әктäщас. Тыв 51 хәннәхә юхтыйлсат. Русскинской кәрт јшколайн 46 хәннәхә яха әктäшийлсат. Вүтвошн па Тәрум лорн Нуви сәнхум районан Нуви сәнхум филиал Ас-угорской институт хуша рәпитеты ёх әктäщты тәхи ләщәтсат. Тәрум лорн 51 хәннәхә хәншас, Вүтвошн – 15 хәннәхә.

Муй вүрн тәм нәпекәт хәншас, щит ищи ушән. 2022-мит олн 956 хәншум хәннәхә эвәлт 358 хуят «отлично» щира (37,5%) хәншас, 371 хәннәхә «хорошо» (38,8%) ёша павәтсат, 201 хәннәхә – «удовлетворительно» (21%), 26 хуятэв (2,7%) хәншты күртәсләт.

Тәм хәншум тәхийн арсыр мир хәншас, щит јшкола ниврәмәт, щалтапа јңкиләл-ашиләл, вәнл-

тийлтү айлат ёх, ниврәм вәнләттәти ёх, пиращ хәннәхәйт, учёной ёх па ар тәхийн рәпитеты хуяттат.

Тәрум лорн тәмәш нәпек хәншты и хотән ёх, рәтна ёх хулыева юхтыйлсат. Щит Иван Яромович Пяк имел пила юхтыйләс па лын ниврәмдал хотән ёхләл пила. Тәмәш хәншты тәхет – щит хуты увас мир ёх рәт ясән пәла көрәтти пәта вәрты тәхет, рәт ясән ар тахия сащты пәта вәрум тәхет.

Щи утат па тәм нәпекәт вантты па ләщәттү вәрәт вәрсайт, арсыр мир рәт ясән тулмащасайт Ас-угорской институт рәпитеты ёхлән. Кашан, ол тата рәпитеты хуяттат хәншты утат па щира вәрәнтийләт.

**Тәм ол тәмәш хәншты утат арсыр ясән, арсыр пүтрупсыя ләщәтман вәрсайт, иса хәтсыр хәнты пүтрупсыя вәрман вәсат (щит вах, касум, Ас күтүп, сәрханл, шурышкарской, приуральской ёх пәта).** Вухаль ясән щит кәт щира вәрман вәс (Ләв па Лозъва вүт ёх щира). Юрн ясән иши кәт щира тулмащасы (Тәрум лор па Охаң ёх щира).

Тәмити щи кашан ясән, кашан пүтрупсыя тәм вәр ләщәтум щира вәс, щит мүн Югра хуша вәлты арсыр увас хуяттат щира ләщәтса.



Тәм нәпек хәншум ёх юхлы пәла ищи хәншләт. Щи хәншты мир пәта, лыв ясән яма тайты пәта Ас-угорской институт сайты хуша «Хәншум тәхи эвәлт хәншты тәхи пәла» рубрика вәрса. Тәм тәхийн вәрәт ләщәтум ёх хәншләт, муйсәр вәрәт яма мәнләт, муйсәр тәхетн ёх хәншты күртәсләт. Щи пәта кашан хәннәхә пишл, вәл тата уша вәрты, муй вүрн елды түнә хәншты, тата лүв пиш тайл ѡн вәты вәрәл оләнән иныштәсти. Щи пәта лупты пиш вәл, тәмәш рәпата вәр и хатл, хән мәнл, тәмәш вәр тәлән ол мәр мәнл.

Кашан хәншум хәннәхә тәм вәр пәта карты щүнк мухты сертификат нәмуп нәпек ёша пәвтас. Па и тәм тәхийн вәлты иныштәсти нәпек хуша ки хәншас, щи пәта лүв «Рәт ясән тайты хәннәхә» мевл пошн мәлү. Мәта ёх тәм вәр ләщәтсат, щи хуяттат па ишакты нәпек ёша павәтләт.

Тәм хәншум вәрәт олән айкеләт Ас-угорской институт сайты хуша лүнәттү пиш вәл. Щаты хәншман вәл: «Мероприятия» ([www.ouipir.ru](http://www.ouipir.ru)).



Ай көр тыләш 20-мит хätлän хäнты не Антонина Иосифовна Ледкова 60 ола йис. Лўв 30 ол мär Нуви сাংхум район Ваньщават кәртän нявлремят рүш ясäңа па литературая вәнлтäс. 2010-мит олн Россия мүвев вәнлтäты вәрät хуват министерства эвälт вулаң ишäкты непекän катлуптäсы.

**А**нтонина Иосифовна Апенсия мäнмал юпийн вәр таклы иса ѣн омäсл. Лўв Нуви сাংхум районан «Семья Югры» па «Югра лылнууптäты» оса вәрät тәты тäхенäна луңман вәл, районан вәлтäы мира арсыр нүшайт түнматты нётл. Ши тумпи лўв арсыр мосты вәрät

## Хув йис, хув непät нäңена!

әхтыйн рәпитäс, щит «Сортын панан нявлремят рүтъшты вәр», «Семь чудес Ванзевата», «А.А. Дунин-Горкавич шәшилум ёш хәриет хуват», «Метэм ханнечэ», «Ханты акань», «Мүн, веккеши нәмты питлүв». Щирн лўв «Признание» па па арсыр ишäкты непекätn катлуптäсы, щитат күтн «Ветеран труда» вулаң нәмн мäсү.

Лўв Ваньщават кәртäшкола оләнән киника ханшты нумас тайл. Антонина Иосифовна сорни ёшнäнтäйл, лўв интäm Нуви сাংхум вошн вәл, ханты аканят пата хурамаң, ханшең, пурмäсät ёнтäл, па тайл.

Мүн, «Ханты ясäң» газетайн рәпитты ёх, лўвела



▲ А.И. Ледкова

ёмäнхätлäl пата ям вүща яснäт луплүв. Хув йис, хув непät уяна-пишäна хоттөл, ёхлän пила вәлд! Еллы манты вәрлän иса яма па түнäт мäнлät! Кашаң хätл,

Кälташ Аңкийн давäлман вәлд! Тäлаң ёш, тäлаң күр!

Путэр ханшäс: **Надежда Рагимова**

## Якутия мүв хә айкеł тәс

Ай көр тыләш ветмит хätäлн Ёмвошевн «Торум Мaa» йис пурмäсät ѫкäтты тäхийн рәпитты ханнечуяят «Тыләш поры» дэштäсät. Щив VII-мит Мүвтөл мирхота юхтум вўлы давäлты ёх вахсыйт. Тäм пүш вўлдэн ёх Россия 16 увас мүвев йирät эвälт тыв юхтыйлсät.

**Л**ыб күтэлн Якутия мүв эвälт юхтум айлат эвен (ламут) хә Никифор Кеметинов. Лўв тäмиты путärtäс:

» Ma тäm Мүвтөл вўлдэн ханнечуяят вәйтантупсия нәмасыя юхäтсум. Лäнхалум уша павäтты, муй щирн па хуты тäm

йисн арсыр увас миран Россия хон пелäк луватн вўлы ташдал давäллät, муй хурасуп нүша вәрät лыв тäмхäтл тäйлät па хуты щитлал ямсыева түнматлät. Ma щирэмн, тäмäш вән вәйтантупсэт арсыр вўлдэн ханнечуяятта сыр-сыр унтас тäлät.

Мосл лупты, хуты тäm күтн Никифор Кеметинов Якутск вошн вәл, лўв юхи хäшум олäтн арсыр увас ёх кäсupsýйн вәс па Россия мүв мастер спорта нәм холумтäс. Еллы лўв иши кäстү вәрата катлäсыйлтү питл.

Путэр ханшäс: **Владимир Енов**



▲ Н. Кеметинов. В. Енов вәрум хур



# Еллы Мүвтөл, мир вүлөн ёх VIII-мит

**Щи оләндан мүвтөл, мир вүлөн ёх VII-мит вән мирхот пурайн юхи хәшум хәтлән уша йис. Па хон пәләк Монголия мүв вүлөн хуятат щи оләндан лупсат.**

Тамхәтл ма хәншлум, муй щирн Ёмвошн нял хәтл мәр щи вән мирхот мәнәс. Мүн, хущева соткем хуят юхтылдасат, па хон пәләк Монголия мүв ёх онлайн щирн айкең тәсат. Мосл лупты, хуты интәм Арктической Совет хуша Россия мүвев кәщая вәл, щирн щимәш вән мирхот мүн хущева ләштәс.

## «Ёмвошан декларация» вән непек вүсы

Нял хәтл мәр «Россия мүвев» хәтләт вәсат, щата арсыр тәхет вүлөн ёх лыв нүшайдал па щитат түнматты оләндан путартасат. Щи юпийн «Ёмвошан декларация» нәмпи вән непек вүсы. Щит ямсыева нух вантты юпийн Россия мүвев арсыр тәхет вән кәщайта, вүлөн тәхет кәщайта китлы, дәлн щата суртат ат түнматсыйт.

«Мүвтөл, мир вүлөн ёх» нәмпи оса тәхи кәща хә Сергей Харючи лупас: «Вүлөн хуятат мәт вән вәр тәләт, щи унтасн мүн вүлү нюхи тайлүв. Россия мүвев хүввәттүйн мәт тащән тәхетн вүлү таш лавалты вәр ләштәтман вәл, тәп вүлөн ёх йис щирн щи вәр тәләт. Тәм йисн ар вүлү нюхи ләштәтты ѡн мосл, интәм мәт вудан щир - щит щи вәр тәтү увас мир йис вәлупсы лавалты. Вантэ, вүлү ташт лавалты хоттөл, ёх няврәмәт айтелн рәт щирн путартләт, щирн щата йис вәлупсы лылдән».

Лўй ясчәл, эвәлт уша йис, хуты интәм вүлөн ёх и хурасун нүшайт тайләт - мүв илни питы вуй кәншты тәхет эвәлт щәхар шимла йил. Арсыр вәнт войт вүлү таштата вән шәк тәләт. Вүлөн ёх кәртәтн вәлты хот ѡн тайләт. Юхи хәшум оләтн

вүлөн икет күтн ар хуят ими ѡн тайләт, вантэ, имет ѡн ләнхалат касалтман яңхты. Щи пәта итәх айдат хуятат иши вүлү таш лавалты вәр тәтү ѡн ләнхалат.

Щи суртат түнматты пәта «Мүвтөл, мир вүлөн ёх» ассоциация хуятат английской па рүш ясән-нәнан «Сборник законодательства в сфере оленеводства» есәлсат.

«Мүвтөл, мир вүлөн ёх» тәхи правления кәща хә М. Погодаев лупас, Якутия мүвн ол мәр пурвойт 16 щурас вүлү пурләт.

» Советской лаш пурайн нәмасыя вүлү нюхен пүлье лыпия тәй пунсы, щитат нәрум муй вәнт хүват ара ёвәлсыйт, щит эвәлт пурвой шимл вәс. Россия мүвев кәщайт «Вәнт войт лавалты Бернской конвенция» вән нә-

пекн ёш посат пунсат, щирн интәм щиты вәртү ѡн рахл, - М. Погодаев ястас.

«Югра мүв вүлөн ёх» оса тәхи кәща ләнкәр хә Василий Пяк лупас, хуты Нуви сәнхум район хуша күркәт пешет лоулумләт.



▲ Вән кәщайт мирхот пурайн



▲ Якутия мүв эвәлт юхтум хуятат

Щи вән нүша түнматты пәта Россия мүвев бюджет эвәлт нәмасыя вухән нётупсы мосл, щи оләндан «Ёмвош декларация» непекән хәншы.

Вүлөн ёх вәлупсы оләндан С.Н. Харючи щиты лупас:

» Тәм йисн вүлөн ёх хулна йис щирн вәлләт. Шуши айдат ёх илуват вошән хуятат пәлди вантләт па ишити щи хошум хотн вәлты ләнхалат. Итәх айдат нәңт касалтты ѡн тайләт, щирн ар айдат хә атэлт вәлләт. Щи пәта айдат хуятат вүлү ташн вәлты каш ѡн тайләт. Проектной институт рәпатнекатта мосл нәмасты, муйсар

кен хоттат вүлөн ёх пәта вәртү рахл. Щи вәр иши вән унтас тәт.

Таймыр мүвн карты лухән кен хоттат вәрлыйт, щи оләндан Конгресса юхтум хуят, тынщән вала тәхтү кәсүпсүйн нух питум хә Н. Чупров айтас.

Коми мүв эвәлт Федерация Совет хуша сенатор нә Е. Шумилова лупас:

» Югра мүв кәщайт иса муй вәрсат, дәлн вүлөн имет иши рәпитты непек ат тайсат па мосты пурайн рүтүштәттү ат мәнсат. Ин мүн иса Россия луваттын вүлөн нәңт пәта щимәш мосты непекат вәрлүв.



# ВӘН МИРХОТ Монголия мүвн питл,



В.В. Пяк



▲ Мүйтөл мир VII-мит вүлдөн ёх вән мирхот

Михаил Погодаев ай тәс: «Якутия мүвн итәх колледжаты нәмасыя айлат ёх вүлды таш һавалты вәра вәнләтыйләт. Мүң хущева «Айлат вүлдөн хә» поступсы вүсы, щәта арсыр нәтупсәт оләңан хәншман вәл. Мүң кәщайлув иса мүй вәрләт, ләлн вүлдөн ёха кәншәк ат вәс. Каслуптыйлты ёш хүваттыйн нәмасыя хотат омәссыйт. Айлтыева вүлдөн хуята тылдаш вух вәншака вәрләүв».

«Югра мүв вүлдөн ёх» тәхи кәща хә С.Кечимов лупаң, хуты юхи хәшум оләтн вүт кәртәтн интернет унтасн «IT-стобище», МЭШ – мобильной электронной ашколайт рәпилтәт.

Югра мүв эвәлт Федерация Совет хуша сенатор хә А.В. Новьюхов ищи ям вәр оләңан ай тәс:

» Мүң округевн 2015-мит ол вүш эвәлт вүлды пайл хуша нәмасыя чип шүңк вәрсү. Щи чип хуша иса щивой оләңан хәншман вәл. Щи унтасн мүң лүнәтсүв – ин Югра мүвевн 40 щурас мултас вүлды вәл.

**Вүлды таш һавалты вәр оләңан поступсы**

Вүлдөн ёх VII-мит Конгресс пурайн делегатат

вүлды таш һавалты вәр оләңан ийлуп поступсы нух вантсат па еллы Российской Федерации правительства китсат.

А.В. Новьюхов лупаң:

» Ийлуп поступсыйн арсыр мосты вәрт оләңан нух хәншсүв, ләлн вүлдөн ёха еллы вәлты па рәпитеттә кәншәка ат йис. Ар ол щи вән поступсы хәншсүв.

» Ин щи поступсы тәсъева нух вантлы, түнматлы па еллы вүлды таш һавалты вәр тәттә мүвәттә кәщайта китлә. Вантә, кашән мүв кәщайт ищи лыв пәтэда мосты вәрт щи поступсыя хәншләт, – Е.Б. Шумилова ястас.

С.Н. Харючи пугтартас, муй щирн сыры оләтн щи



▲ Пурмасат вәрты вәнләтәти хәр. Л.Гурьевна вәрум хурат

ийлуп вән поступсы нух хәншсы. Лүв яснәл щирн, тәм олн щи поступсы госдума депутатат вүлдәт.

VII-мит вүлдөн ёх вән мирхот пурайн «Мир оленеводства глазами детей» хурән ванлупсы ләщтәтман вәс. Щит 1993-мит ол вүш эвәлт вәрләү.

Щи тумпи вүлды таш һавалты вәр тәттә пәттә мосты пурмасат вәрты нәмасыя вәнләтәти хәртәт рәпитеттә, «Со вкусом Севера» фестиваль вәс.

Щи хәтләтн «Оленеводы мира» ассоциация

25 ола йис. Щи ёмәнхәтл пурайн дапәтт хуят «За верность Северу» нәмпим мевләпос холумсат. Щи ёх күтн Василий Пяк иши вәс. Лүв, вантә, Югра мүвевн мәт оләң ѹкан вүлды тайты вәр тәттә питтәс, интәм щи вәр еллы тәл. Щи тумпи «Нумто» природной парк хуша инспектора рәпилтә. Василий Владимирович, мүң наң пәтэна амәтсүв. Еллы ищты щи яма вүлды таш һавалты вәр түве!



# «Тёпәң, ясңем» нәмпи наука па

Тäm ол мүң Россия луваттэвн – щит «Йис вәлупсы нух ләшттү ол» па иса мүв луваттыйн «Шуши мир юкан ясңат нух ләшттү яң ол». Тäm оләт Югра хуша «Тёпәң, ясңем» нәмпи наука па вәлупсы щира вәрум мирхотн олңитсайт. Тäm мирхот тәнлүп тылашын 21–23-мит хәтләтн вәс.



▲ Т.А. Молданова па Т.С. Гоголова



▲ З.С. Рябчикова



▲ Г.И. Дунаева. П. Молданов вәрум хурат

Тämäш наука па вәлупсы щир мирхотн и пәләк ёх яха әктäщман путäртсät, кимäт пәләк ёх карты шүңкät мухты путäртсät. Мирхот Мегион вошн «Экоцентр» нәмуп тäхийн олңитса.

**Тämäш мирхот вәрты Югра Дума депутат Т.С. Гоголова нумäс пунäс. Мирхот вәрать «Экоцентр» хуша рәпилтү ёх (кәща не Р.Б. Галив) ләшттү нётсät.**

Мирхотн кәща юканы вәс па путäрттү ясңат түңа тәс С.Ф. Прасина. Лўв Baxh xäntet ясңän яма путäрттү хännexh па щи ясңän вәnlätty непекäт вәрты ими.

Мирхотн 18 хännexh Югра мүвев па Санкт-Петербург вош эвәлт ясңан вүйлясät па путäртсät. Тäx ёх рәт ясңän путäртсät. Карты шүңкät мухты путäр тäйсät па хон пәләк хүяттä, лўв хулыева хänty вәлупсы па хänty ясңан вәnlätty хүяттä, щи пäta лўв хулыева хänty ясңän путäртсät. Щит: Эстер Рутткаи-Миклиан (Венгрия эвәлт), Штефан Дудек па Жофия Шён (Германия эвәлт).

Мирхота юхтылум ёх Покачи воша па Нанкъёган нәмуп вәнт кәрта яңхсät. Покачи воша мирхота юхтум ёх тәнлүп тылашын 22-мит хätläñ мирхот ләштүтум ёх пила мänsät. Щи вошн лўв путäрттү щира әкмум ёхн лавäлтсайт.

«Мүй вүрн лўләнä хäйтү па еллы тәты шуши мир рәт ясңат» нәмуп тата ёнта пäsan вәрсät. Вош

эвәлт әкмум па юхтум ёх шай янышман күтэлн путäртсät, муй вүрн тäm вәлупсыйн рәт ясңан па йис вәрать нявлремäta еллы тәты щира ләшттү, тäm вәратьн вәлты лавärt вәрать оләнän па путäртсät. Яма кäлäc, кашäñ путäртум хännexh лўв нумäс лыпийн муй па сäм лыпийн тäйтү ясңат есältäс па тäm вәйтантупсы вәрты ёха ям ясңан лупсät.

Хэн путäр етшäс, ма вана хätsум вәра нумäца путäртум ими хонаča, щит Покачи вошн ай нявлремäт яңхты «Хätläye» хуша рәпилтү ими М.М. Рамазанова. Лўв ясңäлн:

» Мäнëма вәра әмäш йис вәратьләшттү тäхийн рәпилтү, хäntet вухаль ёх йис вәрать, ясңатуша вәрты па щи вәрать нявлремäta путäрттү. Ма Дагестан эвәлт тыв юхтылум, рәт ясңем, рәт йис вәлупсем вәра яма тäйлэм па ма нявлремäta еллы павätlum. Ин хуты мүң хänty мир мүвн вәллүв, щи пäta ма нявлремäma па садик нявлремäta иса пүш тäm мир оләнän, йис вәрать оләнän путäртлум, тäm мүв мир пурмäсät ванлтälum. Мүң хуты тäm мүвн мойн ёх, щи пäta хäntet вәлупсы мүңева яма вәты мосл. Па лупты вүтäшлäum, щи күш сыр-сыр тäхийн йис вәрать оләнän путäртлät, ванлтälät, ищимурт тәп änki-aщи мухты йис вәлупсы нявлремäta павättty пиш вәл.

Тäm вош юпийн мирхота юхтум ёх па еллы мänsät, щит Нанкъёган



# ВӘЛҮПСЫ ЩИРА МÄНУМ МИРХОТ

вүләң вәнт кәрта. Тäта Покачев ёх вәллätт. Юхтум мир па кәртäн ёх сäмäңа вәйтантсäт. Елена Николаевна па Вячеслав Геннадьевич, лын няврэмдäл па рäтнаäläл пиля тäта вәсäт.

**Мойң ёх янышлätäты-лапäтты пäта кәртäн ненäл упи Любовь Николаевна Айпина па кәртäн хэ упи Любовь Геннадьевна нётсäнäн. Лын иса пүш сыр-сыр пүтäт веरсäнäн, кавäртсäнäн, хäнты щира веरум лëтутн ёх лапäтсäнäн. Щит нюхи па хүл эвäлт кавäртум лëтутäт, мëт олäñän пäсана потум нюхи па потум хүл омсäлтäсы.**

Щи юпийн па кәртäн кätçän тäм кäрт олäñän па Покачев рäт мир олäñän пүтäртсäнäн. Щит кäрт хүват шäшман па сыр-сыр хотäт, лупасäт ванлтäсäн. Тäм кäрт мëта вән кäрт вәс, нäл вәлты хот тäйс.

Вошäт эвäлт юхтум ёх өмшлätäты пäта кäрäщ юхан сäñхум хонäñän, рүва өхтыйн ратхär веरса. Щи тäхи эвäлт рат хäр тüt хонäñän омäсман муй па лольман хурамäң ўñяң мүв пëла вәнтты веरа өмäш вәс. Юхтум ёх пäта нюки хот па лольтäсäт, тäта кәртäн ёх хäнты ясäñän моньшäт-путрат пүтäртсäт, арät арисäт.

Щи юпийн па юхтум ёх мурта вүләң өхäldн хäтäтьлясäт па мäта хуят лäñхас, лоньшäн ўñхты утн па хäтäтьляс.

Етн олäñän арал пелäк мойң ёх Покачи воша юхлы пëла мänsäт, тäх ёх па кәртäн холты щира хäшсäт.

Алäñая, юхлы мäntы елпийн, мойң хуяттä кәртäн ёха ар юм ясäñ



▲ Мирхота юхтылуум хännexuyatä

лупсäт. Югра Дума депутат Т.С. Гоголева юм ясäñ лупасä:

» Нанкъёган – щит хуты нацкäн юхан. Мүн иис төлн вәлэв, нацк – щит мëт так ѹх, өnumты мүвэл – щит тäлаца яма вәлты мүв, щит ѡрäңа-щäмäңа вәлты мүв. Ма веरа лäñхалум, тäм кäрäщ сäñхум хуща, тäм юхан хонäñän па веरа ар пүш мир яха ат ѣктäшлät па итамиты юм нумäсн, юм сäмн күтэлн ат пүтäртсäт. Па унäл пүншум рäт ясäел елты пëла ат тэлэл, няврэмäт, айлат ёх тäм вәлты вәлупсыйн лыв ясäел, лыв мireл вәлупсы елты вана ат тайлэл па лыв няврэмдäла елты ат хäйлэл.

Па мойң ёх иши арсыр юм ясäт лупсäт.

С.Ф. Прасина:

» Мүн ин нацк юхан мүвн. Щи пäта ма нумсäма Григорий Лазарев хäñшум ясäт юхäтсäт.

Вантэ, нацк юхин долъ Кäрäщ сäñхум рувайн долъ,

Этэр хäри тäрум вәнта Ухиедäн лüв хойс.

Ма веरа лäñхалум, тäм вәнт кәртäн ѹх итамиты

нацк иты така, яма ат вәллät, лавärt сурт, лавärt вәлупсы лывела ал хойл, вәлупсы пäнтэл түчä ат мänl. Тäп мүв өхтыйн тaka долъман тäм вәлупсыйн, тäм шуши мир пäта лëштäум ян ол мäрн мүн мулты веरты, лëштäтты пищев вәл. Мүн хулыева тäм олäтн нумäслöв така ат тайлäлöв, вәлупсэв түчä ат мänl, щирн иилгä өnumты няврэмлöв мүн иис вәлупсэв, иис ясäев юм щи хäйлэв.

З.С.Рябчикова, А.И.Герцен немуп Российской государственной педагогической университет хуща айлат ёх вәnlтäты ими:

» Там мирхот веरа яма мäñäc, кашäñ тäхийн, хуяятä мäтä веरа вýянтсäт, щи веरа түчä мänsäт. Мëт өмäш вәс хännexäyt пила вәйтантыйлт, хännexäйт пила пүтäртты. Мëт сäмäñ, юм ясäñ ма кәртäн ёха китлум, щи мурта лыв мүнты пуньхиман-вошхиман тäйсэл, щи мурта сäм хошум рүвн сämlöv-numäslöv хошмäлтäсэл. Елты па тäлаñä-йма ат вәллät.

Тäмäш юм ясäтн наука па вәлупсы щира веरум мирхот щи хултäсы.

семи щи веरа щи каллät. Ма вәнт кәртäта шимл пүш ўñхийллум, щи пäта хännexuyatä, хуятат тäмäш веर веरсäт, хуятат мүнты лапäтсäт-янышлätä, юм ясäñ китлум. Мëт вән юм ясäñ Т.С. Гоголовая, лüв ки мäntы ѹн вохсäллэ, ма тäмäш юм мир пила хäн вәйтантыйлтсум.

Т.А. Молданова, Югорский университет хуща айлат ёх вәnlтäты ими:

» Там мирхот веरа яма мäñäc, кашäñ тäхийн, хуяятä мäтä веरа вýянтсäт, щи веरа түчä мänsäт. Мëт өмäш вәс хännexäйт пила вәйтантыйлт, хännexäйт пила пүтäртты. Мëт сäмäñ, юм ясäñ ма кәртäн ёха китлум, щи мурта лыв мүнты пуньхиман-вошхиман тäйсэл, щи мурта сäм хошум рүвн сämlöv-numäslöv хошмäлтäсэл. Елты па тäлаñä-йма ат вәллät.

Тäмäш юм ясäтн наука па вәлупсы щира веरум мирхот щи хултäсы.

Путэр хäñшäс: **Петр Молданов**



Ай көр тылдәш 14-18-мит хәтләтн «Торум Маа» йис пурмасът әкәтты па шавиман тайты таҳийн XXVI-мит «Шуши мир хурамат» нәмпи научной вәнләтәты хәр рәпитәс. Тата Югра мүв 13 вән па ай вош-кәрт эвәлт 80 мултас хүят онлайн па оффлайн щирн сырыя лүнтупсыйн еллы па вәнләтәты хәрн рәпитәс. Сәк кәрәтты, түрлөпәс ёнтты па пәтәрух картэт эвәлт тәса па хурамаңа йис карты посат па па хурамаң утәт ләщттты вәра вет вәнләтәты хүят вәнләтәс.

## Сәкәң хурамат вәрсәт

**Щ**иты Тәрум юхан хәнтәт щирн нәй, шүл па сәк эвәлт «Рок» нәмпи хурам вәрты Сәрханл мүв Русскинская кәртән А.П. Ядрошников нәмпи мүв-авәт па хәннәхә музей хота пилтәшум увас мир вәртәт тәты таҳийн рәпитты айлат нә Фаина Комтина вәнләтәс. Лүв ясәнләл щирн, вәнләтәты хәрн вәнләтум Тәрум юхан хәнтәт сәкәң хурам – щит мәт йис щирн вәрум хурамаң пурмас. Тәм йис муртәңа щимәштутвантты рахл.

**«Народный мастер России» нәм тайты вәнләтә ювум хәнты ими Зоя Лозякова па «Лыләң союмн» шуши нявләмәт хәнты мир йис вәртәта па рәт ясәңа вәнләтәты нә Галина Молданова сәк эвәлт түрлөпәс па мевл дөпәс вәрты вәнләтәснән.**

Конда юхан хонәңән вәлтү вухалят тайты паль сәк нәмүп сәкәң хурам вәрты щир Нуви сәнхум вош эвәлт юхтум вухаль имие Татьяна Тарасова ванләтәс.

Ими ўнтуп кел ләщттты щира пәтәрух эвәлт нәмасыя карты посат вәрты Касум мүв эвәлт юхтум Тарлиннән Яков аши па Георгий пух ванләтәснән. Яков Никифорович Тарлин – «Народный мастер России» нәм тайты, айлат ёх шуши мир ёрашты вәртәта вәнләтәты апрән па вәрән хәнты хә. Лүв ипуша Ёмвошн ләщттты арсыр

вәнләтәты хәрәта вохәнглы. Вантә, рәт ёхдал йис вәртәт тәса вәл па така тайл. Щитлала интам айлат ёх щи вәнләтәл. Мосл ястәты, хуты Тарлиннән кәтнән пила вәнләтәты хәра Зоя Тарлина ўнкән иши юхтыләс. Зоя Никоновна Тарлина (эви опраш нәмл Гындышева) тунты хушапат щи мурта хурамаңа вәрты вәнләс, сәмәләдама амат. Щәлтә сәкәң хурамат, түрлөпәс иши хурамаңа вәрты хошл. Щи вәра лүв интам ләщттты хәрн мойн мир вәнләтәс.

Вәйтантупсы сухнум елпийн кашәң вәрутан, хәннәхә ишәк нәпекин мойләсъ па пәмашипа яснәтн лупсы. Итәх хүяттәт юхлы иши пәмашипа яснәт лупсәт. Щиты йис вәртәт тәса вәты хәнты ими Зоя Лозякова ястәс:

**» Ma, вантә, муй щирн арсыр вәртәт оләңән яма вәты питсум? Ma иса пурайн вәнләтәйләдүм. 1974-мит од вүш эвәлт арсыр вәнләтәты хәрәтн вәллялум. Щәтә ўнтә тәп ма мир йис вәртәта вәнләтәлум, итәх пурайн ма вәнләтәлоум. Щи пәтә кашәң хәтл па ипуша арсыр вәртәт вәнләтуман еллы вәлтү мосл.**

Еллы нявләмәт вәнләтәйләт кәша киникайт хәншты хүят, Россия мүв луваттын эвет па пухат вәнләтәты хүят нәм тайты хәнты мир профессор Евдокия Нёмысова иши ясәң вүйляс:



▲ Вәнләтәты хәра юхтум ёх



▲ Г.С. Молданова түрлөпәс кәрәтты вәнләтәл. И. Самсонова вәрум хурән

**» Тәм вәнләтәты хәрн щи мурта яма па амтәна хәтләт мәнсәт. Щи мурт әмәш, хурасән па вәрән нәниет па хәйт! Сәмәмн щикем ям па хошум. Еллы иши нумәсн, ям па мосты вәрн вәйтантыйләттү пилтүв.**

Ияха лүнгәтты ки, щи вәнләтәты хәр етшум пурайн 25 хәннәхә сәк кә-

рәттү па пәтәрух карты пила рәпитты вәр пәтә ишәк нәпекәтн катлуپтәсыйт. Вантә, лыв тәм вәнләтәты хәрн вәрум 39 пурмас «Торум Маа» хота мойләсät.



# Арсыр хানнөхүяттэй нётлүв



▲ М.В. Пуйко. В. Енов вेरум хур

**Мария Владимировна, муйсэр хоттэл ёх күтн сёма питсэн, ёнумсэн?**

► Ма ёл ханнөхүяттэй күтн ар нявлэмэн хоттэл ёх хуша тэм Муши вошн сёма питсум па ёнумсум. Аңкем-ащем вешката па түнцириа вэлупсы хуватн вэсчэн. Ма айтэлн, па иса вэна ювмемн, ён па хэлдийлсум, муй ширн ащем күш юлн, күш па тэхийн мулты вевтам ясэнэн нёхмас па таканшак ўтвылдас. Араттэлн иса вет нявлрем мүн хущева ёнумс. Ма айтэлн ныюм имийн киникайт лүнгэлтийн вэлдэлсүюм. Щи ширемн, хэн Муши вош ёшкола олёнит класса мэнсум, илэмкем минута сухэнты вүшн сотхэс ясэн лүнгэлтийн вэритсум. Эхэт 1982-мит одн күтуп ёшкола етшуптасум па Пулчавт зооветтехникийн вэлдийлсум. Щалта янц од мэр лепкэт ёнмэлти тэхийн «Мужевской» совхосн вэй лекара вэсум.

**Муй ширн нэн социальной веरт лэштэй тэхийн рэпиттийн питсэн?**

► Имултыйн 1995-мит одн вэлупсы хурасэв па щирэлти мэнти кердэс.

Иса щи вүш эвэлт ма социальной рэпатнека ѹисум. Сырыя Челябинск вошн юридической техникум етшуптасум. Эхэт «Уральский институт коммерции и права» тэхийн юриста вэндийлсум.

Мэт олёнэн, вантэ, социальной службы хуша рэпитсум. Щи пурайн пенсияя питум ханнөхэ веरт тэса ияха ёкэтсум па нух ханшсум. Мүн районэв хуша хэлум шурас мултас щимэш ханнөхэ ишити ин тэмхэлт вэнты рүтшуман вэл. Кашэн веर түнцириа па вешката лэштэйсум. Щалта ай кэцэя павтсыюм, ёхэт па Лорвош район социальной зашита департамент кэща ненца ѹисум па ин тэта щи тэмхэлт еллы рэпитлум.

**Мария Владимировна, муй ширн нын арсыр ханнөхүяттэй нётлэлтийн?**

► Мүн районэв луватн араттэлн 10 шурас ханнөхэ тэмхэлт вэл. Лапт щураскем мүн социальной тэхевн нух ханшман тэйлдийт. Щит щимэш ханнөхүяттэй: ар нявлэмэн, кэши-мэштэйти, Вулаң лаъл мэр

Тэнял, лүнэн, рэпатаэм ширн яңхмемн, Муши вошн Лорвош районэн ханнөхүяттэй социальной веरт лэштэй департамент кэща не Мария Пуйко пила вэйтантыйлсум па путрэмсум, муй ширн ин лыв хущела рэпиттийн ёх па ненэт ёл хуятаа нётлэлтийт.

рэпитум, арсыр даълын вэлум, Россия па округев мүвнэн ветеран па турэх мэшэн хэйт-ненэт. Щи тумпийн вэн воштэн вэндтийлтийн айлат пухэт па эвет.

Мэт вулаң веर социальной рэпатаев хуши, ма ширемн, кашэн щимэш ханнөхэ лүвела мосты пурайн нётулпсы вухэт государства эвэлт мэты.

**Муйсэр ханнөхүяттэй нын рэпатаин унтасн аршак нётулпсы веरлэлтийн?**

► Ма ширемн, кашэн хэя па ненца мосты араткемн государстваев вухэт унтасн иса нётлүв.

**Хантэта, мата ёхлүв войхүл, велпэслэлтэй, вүлтиаш хуша янхэлтэй па арсыр ай кэртэлтэй вэлдэлтэй мүн иши компенсация вухэт щирэлтийн нётулпсы веरлүв. Вантэ, Россия хон пелэл закон ширн нэмасяя шуши мир ханнөхэйт нётлэлтийт. Щи патя хантэти ёхлүвэй ямсыевыа нётлүв.**

Вулаң даълын вэлум ханнөхэ мүн хущева иса ёнтай. Лывела сырыя иши вэлупсы хуватн нётулпсы веरсүв. Тэм ѹисн муртана Вулаң даъл пурайн рэпитум ханнөхүяттэй хэшсэлт па лыв ишити щи нётлэлтийт. Щалта район Вулаң ханнөхэ нэм холумтум хуятаа па вухэтн ямсыевыа кашэн тылдэш сухуптэлүв. «Вулаң даъл пур

нявлэмэн» веर тэп тэта мосванэн Россия мүв хуша йилуп поступсэл ширн лэштэй. Щи хуятаа кашэн тылдэш шурас шойт вух малүв. Лывела Вулаң даълын нух питум хаталн па ветсот шойт мойлдэлүв. Пиршамум ханнөхүяттэй, мата хэйт-ненэт 65-мит ол вүша юхатсэл, тэп илсм пүш «Йисэнца-нэптэнца ювум ёх» ёмэнхаталн вухэт мойлупсы юкана мүн па вух сухуптэлүв.

**Мария Владимировна, еша Россия па Ямал мүвнэн ветеран нэмэлт холумтум ханнөхүяттэй олёнэн мэты айкец түва?**

► Россия мүвев ветерана лүнгэлтийн ханнөхүяттэй сыр-сыр жилищно-коммунальной вухэт сухуптэтийн нётлүв. Щи патя яма вантлүв, муйсэр хотятн лыв вэлдэлт, хуты лыв хотдал хошмалдайт, муй арат ханнөхэ ин щи хотлэгийн ханшман вэл. Кашэн тылдэшн лывела шурас шойт арат вух сухуптэлүв. Кимит веर, хэн щи ханнөхүяттэй Ямал округев ветеран нэмн юкантэйт. Щи ёх тэп пенсияя мэнтэл, вүшн вэлчи социальной тэхийн эвэлт вухэтн сухуптэтийн питлэйт. Щиты тэмхэлтэй мүн тэтаа вэлдэлүв па районэв луватн вэлтийн ханнөхүяттэй патя вешката рэпитлүв.

Путэр ханшас:  
**Владимир Енов**



▲ Г.Я. Тарлин, В.Ю. Кондин па А.Н. Брусницин



▲ А.Н. Брусницин па В.Ю. Кондин карты лудлэйт

## Ёмәң карты йис вәрят

Тәм ванән Ёмвошн увас мир тәс ёшуп ёх ақтәшийлтум тәхи вәрәнтыйлса. Щит ай көр тылдыш 14-18-митхәтләтн «Торум Маа» нәмуп йис пурмасыт шавиты тәхи хуша вәс. Тата вәрәң имет сак эвәлт кәрәтсәт, вәрәң икет карты эвәлт пурмасыт вәрәнты.

**Ё**мәң карты пида «Кузница обских угров XV-XVI веков» нәмуп тәхийин рәпитетсәт, щимаш хот йит музей хуша вәл. Карты пида рәпитетсәт музейн рәпитетти кätçän Вячеслав Кондин, Анатолий Брусницин па Нуви сәнхүм район Касум вош эвәлт юхтум хә Яков Тарлин, лув «Народный мастер РФ» нәм тайл.

**М**үң вәйман тәйләв, хәнты па вухаль мир хуша карты эвәлт вәрум пурмасыт – щит ёмәна тайты пурмасыт. Карты ёмәң картыя альщалы, щи күш лув лулпи муй па пәтәрух эвәлт вәрум пурмасыт. Щи пәта карты пурмасыт вәрты вәр – щит ёмәң вәр. Тәм хәтл ишиты щи.

Най аңки пела вантман, мәта тәхийин карты лултәлы па пурмаса вәрла, мүң сәмлүүн ёмәң йис вәрәт нух щи хүвләләт.

Тәм ақмум тәхийин ёх нумас тайтасыт йис карты лудлупет икет ѿнтуп кел, пәта вәрты. Тәм йис вәрят нух лынгәлтәты пәта музей ёх вәра хүв мәр сыр-сыр вәрят ләштәтсәт. Мет оләң тәм карты лудләтәты вәрят оләңдан лыв ар нәпек лүнгәтсәт, муй тәхийин муй тәм оләңдан хәншман вәл, щи вәрят вәты мосл. Сырышак па нәмасыя карты лудләтәты наяң хот вәртасыт. Щайлта па мосты карты, мосты лулпи кәншты па ләтты мосас. Эхат па лулпи шошумты хушаптәт вәрты мосас, щи хушаптәт ләваса сухтакәрәт эвәлт хән вәрлайт, ищи мосты утат кәншты мосас.

Хән хә хүятләв рәпитеты олңитасыт, нәмасыя уша йис, тәм вәр ал вәлман хән тывл. Тәх хушаптәт лулпийн пунты юпийн ара рывләт. Щи күш сырьышак тәм вәрят вәрты олңитум ёхлув вәнләтәйләтү йңхасыт.



▲ Карты эвәлт вәрум пурмасыт. П. Молданов вәрум хурат

щи күш лудләң карты лыв ёшн катлыйлсат.

Вячеслав Кондин ясәнән:

» Тата мүң ақтәшийлсүв карты эвәлт хә хүяттәнтуп келәта хурамәң картэт вәрты. Тәм вәртә мүң Леонид Дмитриевич Рязанцев хуша вәнләтәйләтү йңхсүв. Ин паши вәрят тата щи вәрты вүтъщәлүв.

Па лупты мосл, тәмаш карты пида рәпитеты вәртә Л.Д. Рязанцева мет оләң щуши мир пурмасыт тәса вәрты тәхи хуша рәпитеты ёх нәтсат. Картан вәрят вәрты 2000-мит оләтн олңитуса. Лүвеңа мет нәтсәнән

кәтән, щит искусствовед Наталья Фёдорова па Союз мастеров ләңкар нә Светлана Гындышева. Щирн, хә хүяттәт вәрты пурмасыт ақтәшум тәхи юпийн Сүмәтвощ район кәщая нәпек китса, ләлән тәм хәена карты пида рәпитетти хот вәрты нәттә. Елды па тәм кәт хүятән иса пүш тәм карты пида рәпитетти хәя нәтсәнән. Щит мосты ёх пида вәйтантыйлты, карты вәрты тәхета йңхты па сыр-сыр вәрәта. Ин мүңева кәл, тәм вәр нәртама ѿн хәшсәс. Ин ёмәң картан вәрят музей ёх ёрн елды тәләйт.

Путэр хәншасы:  
**Петр Молданов**



# Тәмәшт ёмәңхәтләт мосләт



▲ Вошән мир ёмәңхәтләт вантты юхәтсәт



▲ Л. Мелентьевна «Вурна хәтләт» пурайн Сәрханл вошн эвет якты вәнләтләт. В. Енов вәрум хурҗән

**Имулты пурайн Сәрханл вошән шуши мират тәхийн ләштәтум «Вурна хәтлән» вәсүм. Щи ёмәңхәтләт мәнум вәр ѹпийн нәмасыя щи тәхи хуша рәпитты вухаль эвие Людмила Мелентьевна пила вәйтантыйлсум па ям хүв арсыр айкеләт лўв эвәлтәла уша павәтсум.**

Уша вәрсум, хуты Людмила Лев юхан кәртән Сүмәтвош районнан вухаль хоттөл ар нявләмән ёх күтн сәма питмал. Лўв хәт нявләмәт күтәлн мәт вән эвия вәл па апәлненәлә тәп яртъян ол велди питмал. Аңкелашел эмсыева вухаль вәлты-холты щирәт, йис вәрт па яснел вәйтләл.

Лыв эвел сырьыя Лев юхан кәртән күтуп ѡшколая ѹнхас па щи вәнләтәти тәхел 2003-мит олн етшуптәслә.

Ёхат Людмила Югорской государственной университет «рәт ясач па литература» щирн вет ол мәр вәнләтләс. Щи вәрәл яма сухнуптумал кәмн диплом ёша холумтас па Лев юхан рәт кәртәла юхи вәлты мәнәс.

Юлн вәнләтум щирәлн вәр ѣн мущатас па кәт ол мәр һапкайн рәпиттәс.

Имултын нумас вәрәс па Сәранпауль вошн рәпата кәншты вүянтәс. Щи вошн нявләмәт па

айлат ёх вәнләтәти тәхийн иләм ол мәр мәнты кәмн социальной педагог нә щирн вәс па рәпиттәс. Кимит ол ищи тәхи хуша дополнительной образования нявләмәт вәнләтәти нәна вәс па щи вәрәл тумпийн пухат па эвет вухаль мир вәлты-холты щирәта вәнләттәс.

**Щирла «Шоварп пәл» нәмуп тәхи вәрәс, хуты айлат эвиет хәншет эвәтсәт па сәк пила арсыр ай пурмасыет хурамән вәрсәт. Щимәш щос мәнум пурайн Людмила ай нявләмәт пила тәп вухаль яснәлн лупас па ай эвет ищиты рәт яснәлала түнцириңа па тәса вәнләтсәлә.**

Сәранпауль вошн тәп хәлум ол мәр лўв рәпиттәс па нумсәл, лыгийн па тәхия талсы. Щитәлн 2013-мит олн Сәрханл вошән шуши мират тәхия лўүел яма вәйтты ненделн рәпитты вохсы. Иса щи вүш эвәлт па ин тәмхәтләт вәнты лўв Сәрханл вошн вәл.

**Людмила пугтартас, хуты мет олән пурайн шуши мират рәпитты тәхи хуша лўв ош сух пүнән сухмәтәвәлт вейт тыйты питтәс. Вантә, аңкелн иса ай пурайт вүш эвәлт юлн ар щирн тыйты вәнләтәс. Щирла хәшүм оләтн лўв ар пәләк тунты пила вәрәннты вүянтәс.**

Щи пәта вәрәннты хә Александр Сайнахов пила лын товийн Сәрханл вош ләпн вәлты вәнта ѹнхәнән па тунты хурләнән. Ёхат тунтәт ямсыева ләштәләнән, төвән хәтләт пурайн сорәлләнән па пурмасыет вәрәннты щира ләштәләнән.

**» Ма тәм ванән тунты эвәлт хинт вәрты пиньщасум, арсыр воноштулт па ай хушапәт ямашәк тывләт. И пүш тәта ѹх эвәлт нялы нюхартсум, щит шенк әмща тывас, – тәмиты мәнәма Людмила лупас.**

Щирла инышассәм айлат вәрәннты ненев, муй

щирн тәм Сәрханл вошн кашән товийн «Вурна хәтләт мәнләт», мосл муй ўнтә тәмәшт шуши мир ёмәңхәтләт тәм йисн вән рүш воштн па арсыр мир ёх күтн ләштәттә.

Юхлы лўв пугтартас, хуты «Вурна хәтләтн» лўв иса ай пурайт вүш эвәлт вәлләяс. Щирла арсыр вошән мирн тәм ёмәңхәтл шенк сәмәна па яма тайлы. Лыв вантәт, муй щирн хәнтәт па вухалят тәм хәтл пурайн якты-ариты хотат ванләтләт, лыв тәс, хурамән хәншийн эвтум сухлал уша вәрләт па ищиты морты мүв эвәлт юхәттә вурна ненев әмәтләт. Тәм ненев яснәт щирн, кимит пәләк эвәлт айлат пухат па эвет тәмәш ёмәңхәтләтн ищиты шуши мират культура вантәт па ушнә-сащәнә кашән вәр вәрләт.

Путэр хәншас: **Владимир Носкин**



## НЯВРЕМÄТ ХÄНШЛÄТ

Тынäң, няврэмäт! Сäрханл районäн Лямина кäртäң, äшкоХла няврэмäт «Дом на воде» непек лäщätläт. Щи непек лыив хäлум ясäңän ессälläт: рүш, хäнты па английской ясäтäн. Мүн хäлум тылäш мär ипöш щи непек эвäлт сäрханл хäнтäт ясäңän хäншум путрат тыв вëрты питлëв.



## Йыс йох пан ит волты кантäх йох соват

**К**ачäң ол Русскинскин қантäх йох қича йимäң қатäл волдәл «Йимäң, қатäл вәли тойты йох, кул кенчи пан воех кенчи» Кантäх йох луват памитäләт.

Иkit авәл нәвәрләт, нюр тахләт, кырәхнат саврәмләт, нюл тахләт. Иmit сив памитäләт. Йох инам чурсамнат вәлинат сохлтäхлти тохи лäйләт. Нотпи питәм қо йеләп буранат мәлү.

Мантäма йемат чурсамäң тохи йох туләх соват Кантäх йох сақет пан моләпсит, йемат ковмэр варта.

Аңкäm йаснäтывәл ма вуләм сарпи йыс йох кихäнивәл сақ

варәнтäт ос ит волти йох сукивәл варләт.

Пынт ньомрахты сукивәл варти йох әнти варләт, похләнки варләт. Роk ийчэн канчанки варләт нырыт па корасәпхি шимтäли варта варат.

Иkit моләпсит вәлихи варләт пан моләпси корат ломтäләт канчият йонмин, сарпи тохән әнти варат. Йимäң қатäл қантäх йох волти тохит номта, пан қолти әнти мәнта. Йимат ковен волти қантäх йох эйчарит йовәтләт лäйлта йимäң катлам.

Татьяна Рынкова



## Энма сәвәм пучы пәты моцы



**К**ачäң қантäх ёви айн-унта кäлвул ов сәвта. Ма анкämен йәң олывәл онәлтойем. Номәкçäләм ропилтäтä мәнләм опәт сәвта.

Авит лäхат пыриләт: колән ов сәвта сицкән ярнаснам? Ики йота колха әнты мәнәм ави сумәнтахләх волдәл пан опәтләл, колән лаңäл тохән сәвләтäх. Ики йота мәнты пырән лув сумәнтахнат йимäләл.

Опәт кича сив әнтәм. Вичипи йаçäп сәвәт. Тэм нопәт äвитопетлäl, пыкәт корас сыват сәвләт. Сицкән сәвәт пыра әнам әнты кыçләт.

Сарпи опәт ил авәлта әнты мус-тäх. Ит äвит лäхнам опәтлäl, колән лаңäл тохән авәтлäl. Қантäх йох

сохит сәм ил мосәл тавэрта кунты кät йоқән ов сәвләхән ики йота арпа йаңклән.

Аңкаңкäm мантäм йастäхәл кунты мäтаço әнтäмхи йәл чулатән кät сәкән мосәл сәвта. Кунты чиминт атäм вар әнтäм йаңкäн йämнат кät сәкән ал сәва йемат лаңклән кунты тойхәл ньюла сәвихäла.

Татьяна Рынкова

«Дом на воде» нәмпى непек,  
МБОУ «Ляминская СОШ»,  
Сäрханл район





## ХАНТЫ МИР МОНЬЩУПСЭТ

# Йис пура эвэлт тывум ясңа́т

Тынәң хәнты нявләмлүв! Тәм йилуп вәлупсыйн мүң ар пәләк амамаңтщет юрөмийлсүв, щирн тәмхәтл ләнхалүв уша вәрты, муйсәр амамаңтщет ясңа́т нын вәйтләты. Тәмхәтл мүң катра газетайт эвэлт амамаңтщет йилла нух хәншлүв. Оләңмит моньщуптэт нәпека хәншәс П.Аликов. Ин амамаңтщет яма лүңталы па уша вәралын, муй оләңән кашәң моньщупсыйн хәншман вәл.

- ◆ Йинк илпи сот сәм.
- ◆ Сот хә и есум.
- ◆ Хушапәң ѹх хүват вўрты вухсар ваңкаль.
- ◆ Хот лаңәл пирмың таҳты.
- ◆ Сот хә и ёш.
- ◆ Пәтлам хот сүңән лаш лойл.
- ◆ Тәлта вантләм – кәл, тулта вантләм – ѹн кәл.
- ◆ Ютлаңәл лыюм ики сот наңк алуиммал.
- ◆ Лүңайил-күвшләмәтл, тәлә йил – күвшәл нух өңхләлә.
- ◆ Карты мухты сухум талда.
- ◆ Йинк илпи күмры хот.
- ◆ Каврум йинк күтлупн урум вухсар кавнәмәл.
- ◆ Юхан хүват оңат пәләк хор хәхәл.



- ◆ Ям ڦов ڦолюм тәхитурн па варәш ѹнт етла.

Ин па хәнты хуятын Ф.К. Елескинән хәншлүв ѿктум амамаңтщет. Федор Кондратьевич Елескин Ленинград воишн А.И. Герцен нәмпи пединститут етшуптас. Лүв рәт хәнты ясңа́л, хәнты мирл пәла шенк сәмәң. Хәнты кәртәтн вәлятәл пурайн лүв хәнты моньштәт, йис путрат, амамаңтщет ѹкәтәл.

- ◆ йох тый хүв пос.



- ◆ йох тый щали-вали.
- ◆ Хот лаңәл хишием нянъ пәләк.
- ◆ Хот пәта мәңкәң сор.
- ◆ Вур сот сәм.
- ◆ Йинк сот сәм.
- ◆ Карты мухты ѹх өнуммал.
- ◆ Асңаң-лорңаң шәпи нуви сухум ләр таләсмал.
- ◆ Юхан кимәлн кияртәң турн ләр ڦоль.
- ◆ Хушапәң ѹх хүват вўрты вухсар навәрл.
- ◆ Тый лопсаҳ, тухи лопсаҳ – кәккәк вўюв.
- ◆ Йинк илпи сәмәң калащ.
- ◆ Пәтлам щүңәң кар лүйтәң не, ух лүйтәң не ёнтасл.
- ◆ а) Тәс нә картам сәх кәр.  
б) Лыи кәр, аны кәр.
- ◆ Каврум щорәс күтупн кар миләң єх, ух миләң



- ёх етлийләт, пентиийләт.
- ◆ Каврум йинкпи щорәс шәпи кәт ими лявәтләнән, ѹха ѹнт юхатләнән.
- ◆ Каврум йинкпи щорәс шәпи урум вухсар ваңкарыйл.
- ◆ Сәхәл шәнш эвэлт хәттәтийл шәншал, моритум ики.
- ◆ йох күтуп ланты лопас.
- ◆ йох тый вәл ڦовәң хә.



Оләңмит моньщуптэт «Ленин пант хүват» газетайн 1972-мит ол Ас хәлты тыләш 29-мит хәтәлн 5-мит номерн хәншман вәсәт, кимит амамаңтщет «Ленин пант хүват» газетайн 1977-мит ол вәйт ڦор тыләшн 6-мит хәтәлн 32 номерн ётсәт.

Тәм лопас ләштәс:  
**Ирина Самсонова**

**«Ханты ясан» газета лўңдатты ёх!**

Тамхатл мүн ханты ясан газетаев 65 ол постаты вўраңан хэтмит иньшасулы ханшлув. Юхлы ясан тыв китаты: [khanty-yasang-65@mail.ru](mailto:khanty-yasang-65@mail.ru).

**6. Мата пура вўш эвәлт «Ханты ясан» газетаевн Сәрханл мўв хантэт рәт ясанан нәмасия лопаc ётты питас?**



## Животноводства продуктивность арамтты пата

Ём вош район животноводства рупутникит, хоты и иса округев туваттыны, така тогтит ёш войхут продуктивность нох атымты пата. Район колхозыт кутны иситы си вер пата така тогтител «1-е Мая» рыбартель колхозникит.

Сята ёш войхут тайты ёх эсымийингк, мис вуй, нёхи аршик хотымтты пата иса мар тогтит. Ситы, мис пусты нэнгыт 1958 от мар кашинг мис эвыйт пуссит 1888 килограмм эсымийингк. А мис пусты нэ Ягтина Е.Н. отмаркашнгий мис эвыйт

пусыс 2330 килограмм эсымийингк.

Там ванны Ём вош район ёш войхут тайты ёх районной мирхот утыс. Там мирхота иситы и ёхтыйтсит «1-е Мая» колхоз (Кышик курт) ёш войхут тайты верны сырья манты ар хоят.

Там хут ветпыс артель, эвыйт ёш войхут тайты вер ухтыны утты сырья манты ёх па нэнгыт ёхтыйтсит. Тата тив питэтны ёш войхут фермаита торын таттиды хоятит, мис пусты па мис поших эммыттыны нэнгыт па па ёх утыс.

Тыв кутэтны утыс и мис пусты сырья манты комсомолка Валя Кузнецова па мис пошихыт яма эммыттыны нэ Татьяна Вандымова. Там хатл газетатны тын хортын ханшайнгын.

Комсомолка Валя Кузнецова нәмоты артнысит эвыйт ант пакныс.

1958-мит отны тув колхоз фермая мис пусты нэнгайм рупитта кашасис. Тув 9 мисны масы.

Валя каркам па апрынг эви. Тув маха от кашингий мис эвыйт 1608 литраны эсымийингк пусыс. Там от

туб кашинг ии мис эвыйт – 2000 литраны пуста комсомольской яступсы вус.

Валя мииим комсомольской ястыпсэт та-ка нумман тайтыттэ. Тув январь па февраль тылысыны миинтим плантл ямкема этты тарматыттэ.

**Снимокны: Валя Кузнецова хор памытман**

**«Ленин пант хуват», № 39 (170), 31-мит март 1959 от**

войхут продукция верты верны этты ёхытта па пи-рахийта, тув КПСС члене питты номыс верыс, тутн иса коммунистит питны етпи нартыпны манта партия уны задачайт тарматытты верны.

Тамара Семеновна интам коммунист. Тув и еты пета рупитл си-ты, тутн колхоз мет ям труженикит питны сырья манта.

**В. Семенов «Ленин пант хуват», № 38 (169), 28-мит март 1959 от**

## Ферманы энмыс

Ар ота йис, хоты мис тайты фермая рупитта ёхтыс комсомолка Алачева Тамара. Отынг пуш тув мис поших эммыттыман рупиттыс. Си рупутаитны тум яма рупиттыс. Си мар тув ар мис поших эммыттыс.

Там рупутаны рупиттэт сахат тув питлны сёхлынгтывыс. Куртангыт эвыйт каврым йингки ветра иты вуймет сахат хомпылмистэ па ёшл каврым йингкны

таптыстыт. Хув мар ёшл кашиттыс.

Ёшл нох тунгымтым ювпины Тамара Семёновна мис поших эммытты па ант мошиттыс. Мушинг ёшлны тавырт йингки ветраит атымта ант мошиттыс. Итампи тув фермаит ант воськыттэ. Тув мис пусты нэнга питьс.

Отынг мар еша тавырт күш ус, но Тамара тавырт верйт эвыйт ант пакныс. Мис пусты тус нэнгытпета вантман тув иситы яма

пуста тарынтыс.

Вуратым верл сира тывыс. Моттыкем ота йис, хоты тув Октябрьской район Карл Маркс нэмыйп колхоз сырья манты мис пусты нэнгыт кутны йикемни мантл. Ванкулт тув нэмыйт районной па окружной Почёт сохытны ант мошиттыс. Итампи тув фермаит ант воськыттэ. Тув мис пусты нэнга питьс.

Тамара иса самыт понтыттэ тувет мииим рупута яма верты пата. Хун мунг родной Коммунистической партияев мас ясынг, тутн Америка Соединенной Штаты ёш

**Ханты ясан**  
**(Хантыйское слово)**  
**№ 6 (3594), 24.03.2022**

**Соучредители**  
Дума, Правительство  
Ханты-Мансийского  
автономного округа – Югры  
**Издатель**  
Департамент общественных  
и внешних связей Ханты-  
Мансийского автономного  
округа – Югры

**Редакция**

Директор, главный редактор –  
**Динисламова С.С.**  
Телефон (3467) 33-36-82

Заместитель главного  
редактора – **Вах Н.И.**  
Телефон (3467) 33-24-02

Ответственный секретарь –  
**Рагимова Н.В.**  
Телефон (3467) 33-24-02

**Адрес редакции и издателя:**

628011, г. Ханты-Мансийск,  
ул. Комсомольская, 31  
тел./факс (3467) 33-17-52

**E-mail:** [gazeta@khanty-yasang.ru](mailto:gazeta@khanty-yasang.ru)

Газета размещена на сайте  
[www.khanty-yasang.ru](http://www.khanty-yasang.ru)

**Отпечатано:**

ООО «Новости Югры-  
Производство» г. Сургут,  
ул. Маяковского, 14.

Индексы **04393, 54393**

Тираж **2166** экз.  
Заказ **1145**  
Цена свободная

Газета  
зарегистрирована  
Управлением Федеральной  
службы по надзору в  
сфере связи,  
информационных технологий  
и массовых коммуникаций по

Тюменской области,  
ХМАО-Югре и ЯНАО.

**12+**

Свидетельство о регистрации  
ПИ №ТУ 72-00796  
от 23 января 2013 г.

Мнение авторов публикаций  
не обязательно отражает  
точку зрения редакции.